

17. oktober

UKA2018/173

Misiliilluni aningaasaliineq nunaqarfinni qerititsivinnik sanaartornissamik annertusaanissamullu tapiisarnerni periutsit pissutsillu pitsaanerpaat anguniarlugit qanoq aaqiivigineqarsinnaanera pillugit Inatsisartut Naalakkersuisut nassuiaasioqullugit peqquneqarnissaanik aalajangiiffigisassatut siunnersuut. Nassuiaasiornermi isumalluutit suliffisaqartitsinerit kiisalu aningaasaqarnermut tunngasut kommunit, inuussutissarsiornermik ingerlatsisut aammalu KANUNUPE-p misilittagaat ilaatigut ilanngunneqassapput. Nassuiaat Inatsisartunut agguanneqassaaq, tamatumani nassuiaatip inerniliineri AIS20-imut ilanngullugit suliarineqarsinnaalerlugit.

(Inatsisartuni ilaasortaq Peter Olsen, Inuit Ataqtigiit)

Nunaqarfinni qerititsivinnik sanaartornissamik annertusaanissamullu, Naalakkersuisut nassuiaasioqullugit peqquneqarnissaanik, Inatsisartunut ilaasortap Peter Olsen-ip Inuit Ataqtigiinneersumit qaqinneqartumut qujavugut, Imatullu Siumumiit oqaaseqarfigissavarput.

Illoqarfinni Nunaqarfinnilu aamma umiarsuarni aalisarnermeersunik tunisassiorfeqarnikkut qerititsiveqarnikkut kiisalu tunisassianik assartuinikkut ajornartorsiutit ajornartorsiutaalertartullu tamaasa ataatsimut isigalugit aaqqissuusseqqinnissaq avaqqunneqarsinnaanngilaq, tassanilu naalakkersuisut kaammattorneqartariaqarput tamanna sulissutigisagaat attuumassuteqartut tamaasa peqatigalugit.

Makkualu aaqqiissutissanut ilanngunneqarnissaat Siumumiit kaammattuutigaagut :

Tunitsivinnik umiarsualiisarnermi piumasaqaatit sinaakkutit ullutsinnut naleqqussarneqarnissaat anguneqartariaqarpoq, assersuutigalugu umiarsuarmik tunitsiviliiniartunut piumasaqaatit aatsaat nunaminertaateqarunik tunineqarsinnaasut il.il. nalilersuiffigineqassapput, unammilleqatigiinneq pingaarnerutillugu Nunatsinnut Inuinullu pisuussutitta nalitunerpaaffissaat angoqqullugu.

Illoqarfinni Nunaqarfinnilu unammillerfiunngitsuni unammillertoqarnissaa anguneqartariaqarpoq, taamaatorli apeqqusernartua uvaniilluni aatsaat nunatta iluani unammillertoqaleraangat akit qaffattassanerlutik.

Nunanut allanut niuernitsinni toqqaannartumik niuerfigut niuerfigisinnaangortariaqarpagut akit qaffasinnerpaat Nunatsinnut Inuinullu angusinnaanngorlugit, puigornaguli niuerfitsinnut matut ammatittuarnissaat.

Nunanut allanut niuernitsinni akunnermiliuttut minnerpaaffianiitinnissaat anguneqartariaqarpoq, tassami Nunarput tunisassiassanik anissuiffinnaanani pisiniarfittulli Nunanit allanit toqqaannartumik niuerfigineqarsinnaanngortariaqarpoq, apeqqutaatinnagu tunisassiaq piariigaanersoq suliareqqitassaanersorluunniit uani pingaarneruvoq Nunatsinnut Inuinullu akilersinnaanerpaaffia.

Namminersorlutik Oqartussat suliffeqarfiutaat RG piginneqataasunngorsaaffigineqartariaqarpoq, soorlu makkuninnga Inunnik avammut niuerneramik ilisimasalinnik, suliffimmut attuumassu-tilimmik sulisartunit minnerunngitsumillu aalisartunit, tassami imminnut pinngitsoorsinnaanngillat

taamatut katitigaaniassaminnut suliffeqarfissuaq ilivitsuulluni ingerlassappat ullumikkutut ingerlaannarsinnaangilaq imminnut akerariittut allaat ingerlalertarlutik, Taamatut ingerlatsilissagutta ingerlatseqatigiiffiit malittarisassaasat sukateriffigineqartariaqarput inuit ataasiakkaat pissaaneqarpallaalinnginnissaat anguniarlugu.

Kaammattuutitta arlaqartut Naalackersuisunit eqqumaffigineqarlutik sulianut assigiinngitsunut ilanngunneqarnissaat innersuutigaarput. Taamatut oqaaseqarluta siunnersuuteqartup siunnersuutaa Siumumiit ilalernartinngilarput.

Oqallilluarisilu

Henrik Fleischer, Siumut